

---

# Topik ► Pengenalan

## 1 Ilmu Usul Fiqh

### HASIL PEMBELAJARAN

Pada akhir topik ini, anda seharusnya dapat:

1. Menjelaskan definisi Usul Fiqh;
2. Menghuraikan sejarah perkembangan Usul Fiqh;
3. Membincangkan faedah mempelajari ilmu Usul Fiqh;
4. Menerangkan kandungan ilmu Usul Fiqh; dan
5. Membezakan kaedah aliran ulama-ulama Usul Fiqh dalam mengeluarkan hukum.

### ► PENGENALAN

Usul Fiqh merupakan satu-satunya manhaj ilmiah untuk menetapkan hukum syarak. Ia merupakan panduan untuk memahami serta mentafsirkan nas-nas al-Quran dan al-Sunnah ketika merumus hukum-hakam dan mendabit pemikiran mahupun ijtihad. Pentafsiran yang dilakukan adalah yang berkaitan dengan hukum syarak dan hukum-hakam yang dimaksudkan hanyalah hukum-hakam amali bukan hukum-hakam akidah. Perkataan amali bermaksud semua perbuatan termasuk perbuatan hati.

Majoriti ulama membuktikan bahawa sumber dalil yang dijadikan sandaran hukum adalah al-Quran, al-Hadith, ijmak dan qiyas. Oleh itu, ulama membahas dan menjelaskan bahawa dalil hukum tersebut adalah hujah bagi semua manusia dan sumber hukum syariat yang harus diikuti hasilnya (hukum). Kumpulan kaedah dan perbahasan ulama di atas terangkum dalam sebuah disiplin ilmu iaitu ilmu Usul Fiqh.




### AKTIVITI 1.1

Nyatakan fungsi-fungsi dan kepentingan ilmu Usul Fiqh. Bincangkan dengan rakan-rakan sekelas anda dalam kumpulan.

## 1.1 DEFINISI ILMU USUL FIQH

Istilah Usul Fiqh mungkin asing bagi sebahagian daripada anda. Mungkin juga ada di kalangan anda pernah mendengar istilah itu. Sebenarnya, ilmu ini merupakan antara ilmu bagi disiplin pengajian hukum Islam. Untuk penjelasan terperinci tentang maksud Usul Fiqh, anda boleh lihat Rajah 1.1 berikut.




Rajah 1.1: Maksud Usul Fiqh

Fiqh merupakan himpunan perbincangan fuqaha tentang hukum-hakam isu-isu tertentu, manakala Usul Fiqh adalah ilmu yang menerangkan kaedah dan metodologi yang perlu diguna oleh para fuqaha dalam pengeluaran sesuatu

hukum bagi sesuatu isu. Ini penting bagi memberi gambaran lebih jelas perbezaan antara fiqh dan Usul Fiqh. Maka melalui Rajah 1.1, dapatlah dirumuskan bahawa Usul Fiqh ialah ilmu yang membincangkan kaedah bagaimana membuat kesimpulan hukum syarak daripada sumber atau dalil-dalil syarak.

## 1.2 SEJARAH PERKEMBANGAN ILMU USUL FIQH

Ilmu Usul Fiqh telah muncul dalam tradisi keilmuan Islam bersama wujudnya ilmu Fiqh itu sendiri. Ini memang benar kerana Usul Fiqh merupakan asas kepada kewujudan Fiqh itu sendiri. Secara mudah, proses perkembangan yang dilalui ilmu ini boleh dibahagikan kepada tiga zaman utama seperti yang ditunjukkan dalam Rajah 1.2.



Rajah 1.2: Perkembangan ilmu Usul Fiqh



### SEMAK KENDIRI 1.1

1. Dengan ringkas, nyatakan definisi Usul Fiqh.
2. Mengapakah ilmu Usul Fiqh dianggap satu disiplin pengajian? Jelaskan.

## 1.2.1 Zaman Awal Islam

Usul Fiqh telah lama wujud sebagai satu kaedah penentuan hukum. Namun kemunculannya sebagai satu cabang ilmu yang tersusun berlaku satu abad lebih selepas kewafatan junjungan besar kita, Nabi Muhammad SAW.

Zaman awal Islam terbahagi kepada dua iaitu:

- Zaman Sahabat; dan
- Zaman Tabi`in.

Mari kita bincang kedua-dua bahagian ini dengan lebih lanjut.

(a) **Zaman Sahabat**

Sebarang masalah dirujuk kepada para Sahabat kerana mereka mampu mengeluarkan hukum terus daripada al-Quran dan al-Sunnah disebabkan beberapa faktor iaitu:

- (i) Penguasaan bahasa Arab yang baik membolehkan mereka memahami al-Quran dan sunnah dengan tepat.
- (ii) Mengetahui asbab nuzul al-Quran dan asbab al-wurud sesebuah hadis.
- (iii) Kebanyakan mereka adalah perawi hadis.

(b) **Zaman Tabi`in**

Gerakan ini semakin meluas selepas Zaman Sahabat disebabkan berlakunya pelbagai perkara baharu dalam masyarakat.

Para ulama tabi`in seperti Sa'id bin Musayyab, Urwah bin Zubayr, Qadi Syurayh dan Ibrahim al-Naqa'i telah menggunakan kaedah tertentu dalam membuat kesimpulan hukum. Namun, mereka belum menyusun kaedah tersebut dalam satu bentuk ilmu yang tersusun.

## 1.2.2 Zaman Penyusunan

Perkembangan baharu telah mula tercetus pada zaman ini yang dikenali sebagai zaman para mujtahid. Keperluan ilmu Usul Fiqh telah mula dirasai. Antara sebab perkara ini berlaku adalah:

- (a) Banyak masalah baharu yang timbul.
- (b) Penguasaan bahasa Arab di kalangan orang-orang Arab agak lemah.

- (c) Perluasan wilayah-wilayah Islam dan percampuran orang-orang Arab dengan orang-orang Ajam.
- (d) Munculnya perdebatan antara umat Islam, khususnya yang terdiri daripada dua kelompok besar iaitu ahli-ahli al-hadith dan ahli al-ra'y.

Perkembangan tempatan dan semasa yang berlaku menuntut para ulama mempunyai kaedah penyelidikan yang mantap untuk menangani keperluan yang wujud pada waktu itu.

Imam Muhammad bin Idris al-Syafi'i dianggap sebagai pengasas ilmu ini melalui kitabnya al-Risalah yang membincangkan tentang al-Quran dan al-Sunnah dari segi kehujahan serta kedudukan kedua-duanya sebagai sumber penentuan hukum. Ia turut membahaskan sumber hukum yang lain seperti qiyas, ijma' dan aqwal al-sahabah.

Imam Syafi'i mengambil pendekatan pertengahan (kompromi) iaitu lebih banyak menggunakan al-ra'y, namun ia tidak seluas Abu Hanifah. Imam Syafi'i juga menggunakan pakai hadis tetapi pendekatan ini tidak seluas pendekatan Imam Malik.

### **1.2.3 Zaman Selepas Penyusunan**

Al-Risalah merupakan model penulisan Usul Fiqh yang pertama dan telah dijadikan asas kepada perkembangan usaha selanjutnya. Selepas tersusunnya al-Risalah, ulama-ulama terkemudian telah membuat usaha baharu berdasarkan kitab tersebut. Antaranya, usaha-usaha untuk membuat penghuraian dan ulasan terhadap beberapa konsep dan kaedah yang dikemukakan oleh Imam Syafi'i.

Berikut adalah sebahagian kitab penulisan yang lahir selepas kitab al-Risalah (kurun keempat):

- Kitab Ta'at al-Rasul;
- Al-Nasikh wa al-Mansukh;
- Kutub al-'Ilah;
- Ibtal al-Taqlid;
- Ibtal al-Qiyas;
- Syarh Abu al-Walid al-Naisaburi;
- Syarh Abu Bakar al-Sairafi; dan
- Syarh al-Qaffal al-Syasyi.



### SEMAK KENDIRI 1.2

Dengan ringkas, jelaskan perbezaan ilmu Usul Fiqh ketika zaman awal Islam, zaman penyusunan dengan zaman selepas penyusunan.

## 1.3 FAEDAH MEMPELAJARI ILMU USUL FIQH

Penguasaan ilmu Usul Fiqh ini sangat penting dalam pengajian hukum Islam. Faedah utama ilmu ini ialah memberi kemahiran untuk menentukan sesuatu hukum yang terkandung dalam teks al-Quran dan al-Sunnah sebagai perundangan Islam.

Mari kita fahami serta renungkan antara faedah yang dapat kita peroleh setelah mempelajari ilmu ini yang akan dijelaskan di Rajah 1.3 di bawah.




Rajah 1.3: Faedah ilmu Usul Fiqh

## 1.4 KANDUNGAN ILMU USUL FIQH

Sebagaimana yang dijelaskan sebelum ini, ilmu Usul Fiqh adalah ilmu yang membincangkan tentang kaedah bagaimana suatu kesimpulan hukum syarak bersifat amali. Hukum itu pula diambil dan dirumuskan daripada dalil dan sumbernya. Dengan demikian, kandungan ilmu ini sudah tentu akan menyentuh dalil-dalil atau sumber-sumber hukum syarak dan hukum syarak itu sendiri secara umum atau ijmali. Dari sumber ini, kaedah Usul Fiqh akan dirumus dan dibentuk.

Rajah 1.4 menyatakan tiga sumber kaedah Usul Fiqh yang dibentuk berpandukan al-Quran dan al-Sunnah.



**Rajah 1.4:** Al-Quran dan al-Sunnah sebagai sumber kaedah Usul Fiqh

Dengan kaedah yang dibentuk ini, para ulama akan membuat penelitian terhadap sumber-sumber hukum sama ada berpandukan al-Quran dan al-Sunnah untuk menghasilkan suatu kesimpulan hukum amali. Sebagai contoh, kaedah Usul Fiqh menyebutkan bahawa setiap ayat perintah biasanya akan mendatangkan hukum wajib.

Contoh-contoh ayat al-Quran berupa arahan dan perintah dapat dilihat dalam Rajah 1.5.

وَأَقِمُوا الصَّلَاةَ

Maksudnya: "..dan dirikanlah solat.."

(al-Baqarah 2:110)

وَاتُّوْا الزَّكَوْةَ

Maksudnya: "..dan tunaikanlah zakat.."

(al-Baqarah 2:110)

وَأَقِمُوا الْحَجَّ وَالْعُمْرَةَ لِلَّهِ

Maksudnya: "..dan sempurnakanlah  
ibadat haji dan umrah kerana Allah.."

(al-Baqarah 2:196)

**Rajah 1.5:** Beberapa contoh ayat Al-Quran yang menyatakan arahan atau perintah sesuatu

Ilmu Usul Fiqh akan menyentuh perbincangan dalil-dalil hukum syarak secara umum atau ijmal dan tidak menyentuhnya secara terperinci atau tafsili kerana perbincangan yang lebih menyeluruh akan dibincangkan dalam hukum fiqh. Perbezaan antara kaedah Usul Fiqh dengan hukum fiqh atau amali boleh dirumuskan melalui Jadual 1.1 berikut.

**Jadual 1.1:** Perbezaan Kaedah Usul Fiqh dengan Hukum Fiqh


Kaedah Usul Fiqh	Dalil Ijmali	<ul style="list-style-type: none"> <li>Setiap dalil atau ayat perintah menunjukkan hukum wajib.</li> <li>Setiap dalil atau ayat larangan menunjukkan hukum haram.</li> <li>Setiap lafaz umum ('am) menunjukkan hukum yang menyeluruh.</li> </ul>
Hukum Fiqh	Dalil Tafsili	<ul style="list-style-type: none"> <li>Ayat memerintahkan wajib menunaikan solat. Contohnya, Surah al-Baqarah 2:110.</li> <li>Ayat memerintahkan wajib menunaikan zakat. Contohnya, Surah al-Baqarah 2:110.</li> <li>Ayat memerintahkan wajib mengerjakan haji. Contohnya, Surah al-Baqarah 2:196.</li> </ul>

**SEMAK KENDIRI 1.3**

1. Berasaskan apa yang sudah anda pelajari, nyatakan perbezaan yang ketara antara dalil ijmal dan dalil tafsili.
2. Pada pendapat anda, mengapakah ilmu Usul Fiqh tidak wujud pada zaman Nabi Muhammad SAW? Nyatakan.
3. Berikan lima contoh ayat al-Quran yang lain yang menunjukkan perintah wajib.

## 1.5 ALIRAN ULAMA ILMU USUL FIQH

Hasil daripada perkembangan ilmu Usul Fiqh, wujud dua aliran pemikiran hukum yang jelas seperti yang ditunjukkan dalam Rajah 1.6.

**Rajah 1.6:** Dua aliran ulama ilmu Usul Fiqh

Kadangkala antara kedua aliran ini berlaku perdebatan yang serius. Hasilnya, penyusunan ilmu Usul Fiqh yang teratur sebagai garis panduan yang lengkap kepada penyelidikan hukum menjadi semakin penting. Inisiatif ke arah cita-cita tersebut akhirnya menjadi kenyataan.

**Imam Syafi'i**  
**Pengasas Penyusunan Usul Fiqh**

Beliau merupakan orang pertama yang berusaha mengumpul, menyusun dan membukukan kaedah-kaedah Usul Fiqh. Usaha ini dibuat sejurus mendapati terdapat pelbagai perdebatan dan perbahasan antara kedua-dua aliran tadi. Oleh yang demikian, adalah menjadi satu disiplin ilmu dalam membuat satu kesimpulan hukum bagi membolehkan para mujtahid aliran Madinah dan Iraq menjadikan gagasan tersebut sebagai panduan dalam ijtihad mereka.

### 1.5.1 Aliran Ulama

Sebagaimana yang dijelaskan terlebih dahulu, terdapat dua aliran pemikiran iaitu aliran pemikiran Madinah (aliran Imam Malik bin Anas) dan aliran pemikiran Iraq (aliran Imam Abu Hanifah). Kedua-dua imam tersebut telah pun menyusun penulisan yang dianggap baharu dan tersendiri dengan membawa metodologi yang tersendiri. Penulisan-penulisan tersebut disusun berdasarkan kepada unsur-unsur berikut:

- (a) Hukum-hakam fiqh;
- (b) Dalil dan sumber-sumber hukum tersebut;
- (c) Kaedah dalam membuat ketetapan hukum; dan
- (d) Ulama mujtahid.

Jadual 1.2 menjelaskan tiga aliran rumusan daripada dua aliran pemikiran hukum ulama.

**Jadual 1.2:** Aliran-aliran Rumusan

Aliran-aliran Rumusan	Penerangan
Aliran Ahli Ilmu Kalam	<ul style="list-style-type: none"> <li>Diwakili oleh para ulama mazhab Maliki, Syafi'i dan Mu'tazilah.</li> <li>Mereka menekankan unsur penetapan kaedah yang bersifat teori dengan sokongan dalil aqli dan naqli.</li> <li>Kitab-kitab yang dihasilkan ialah Al-Mu'tamad oleh Abu al-Husin Muhammad bin Ali al-Basri, Al-Burhan oleh Imam al-Haramain al-Juwaini dan Al-Mustasfa oleh Imam Ghazali.</li> </ul>
Aliran Hanafi	<ul style="list-style-type: none"> <li>Generasi ini menggunakan kaedah berdasarkan hukum-hukum fiqh yang diambil daripada ijтиhad yang dibuat oleh imam-imam mazhab.</li> <li>Jika didapati beberapa kaedah tertentu berlawanan dengan hukum fiqh, mereka akan berusaha mengubah kaedah tersebut supaya selari dengan hukum yang ada.</li> <li>Kitab-kitab yang ada ditonjolkan oleh aliran ini ialah Kitab Usul al-Kharkhi oleh Abu al-Hasan al-Kharkhi, Kitab al-Usul oleh Abu Bakar al-Jassas, Ta'sis al-Nazar dan Taqwim al-Adillah oleh Abu Zaid al-Dabusi.</li> </ul>
Aliran Muta'akhkhirin	<ul style="list-style-type: none"> <li>Usaha bersama ulama Hanafi dan Syafi'i dalam pembentukan kaedah usul yang disertakan dengan dalil serta hujah-hujahnya.</li> <li>Antara kitab yang ditulis dalam aliran ini ialah Badi' al-Nizam, al-Jami' Bayn Usul al-Bazdawi Wa a-Ahkam oleh Muzfiruddin al-Hanafi, Tanqih al-Usul oleh Ubaidullah Ibn Mas'ud al-Hanafi dan Tashil Usul al-Fiqh oleh Abdul Wahab Khallaf.</li> </ul>

## RUMUSAN .....

- Usul Fiqh didefinisikan sebagai ilmu yang membincangkan tentang kaedah dan cara menetapkan hukum.
- Ilmu Usul Fiqh mengalami tiga tahap perkembangan iaitu zaman awal Islam, zaman penyusunan dan zaman selepas penyusunan.
- Setiap tahap tersebut mempunyai latar belakang dan ciri perkembangan tersendiri.

- Zaman penyusunan merupakan kemuncak kepada perkembangan ilmu Usul Fiqh.
- Imam Syafi'i adalah penyusun pertama ilmu Usul Fiqh.
- Pembaharuan terus dilakukan dalam penyusunan dan penulisan Usul Fiqh sehingga hari ini.

## KATA KUNCI

Aliran Mazhab Hanafi	Imam Syafi'i
Al-Quran	Sahabat
As-Sunnah	Tabi'in
Dalil ijmalı	Usul Fiqh
Dalil tafsili	Wajib



## RUJUKAN

- Al-Ghazali., & Abu Hamid Muhammad bin Muhammad. (1332H). *Al-mustasfa min 'ilm al-usul*. Kaherah: Matba'ah al-Amiriyyah.
- Al-Juwayni., & Abd al-Malik. (1999). *Al-burhan fi fi usul al-Fiqh*. Mesir: Dar al-Wafa'.
- Al-Razi., & Fakhr al-Din Muhammad. (1992). *Al-mahsul fi ilm al-usul: Cet. 2*. Beirut: Mu'assasah al-Risalah.
- Al-Shawkani., & Muhammad bin Ali. (2000). *Irshad al-Fuhul Illa Tahqiq al-Haq Min Ilm al-Usul: Jil.1*. Beirut: Dar al-Fikr.
- Al-Zarkashi., & Badr al-Din. (2000). *Al-bahr al-muhit fi usul al-Fiqh*. Beirut: Dar al-Kutub al-Ilmiyyah.
- Muhammad Abu Zahrah. (1997). *Usul al-Fiqh*. Kaherah: Dar al-Fikr al-Arabi.
- Shalabi., & Muhammad Mustafa. (1986). *Usul al-Fiqh al-Islami*. Beirut: Dar al-Nahdah al-Arabiyyah.

Zaydan., & Abd al-Karim. (1993). *Al-wajiz fi usul al-Fiqh*. Maydan Sayyidah Zaynab: Dar al-Tawzī` Wa al-Nashr al-Islamiyyah.

Zuhayr., & Muhammad Abu al-nur. (2004). *Usul al-Fiqh*. Beirut: al-Madar al-Islami.